

# Powšitkowne WOZJEWJENJA

njedźelu, 29. nowembra 2015

## Wječork k nabožnemu kubljanju dźěci

Na wječork k temje „Što je wažne za nabožne kubljanje dźěci?“ su wšitcy zajimowani pjatk, 4. decembra, do Wotrowa přeprošeni. Přednošk změje swójbna referentka Drježdžansko-Mišnjanskeho biskopstwa Claudia Leide. Započatk budže z Božej mšu we 18.00 hodž.

## Beneficny koncert a spěwny wječork w Jaseńcy

Na serbski beneficny spěwny wječor sobotu, 5. decembra, w Jaseńcy přeprošuje Florian Rynč zhromadnje z muskim spěwnym kwartetom „PoŠtyrjoch“. Započatk w Rynčec bróžni w Jaseńcy (číslo 8) je w 19.30 hodž. Wopytwarjo smědža so na wotměnjawy program wjeselić. Nimo skupiny „PoŠtyrjoch“ wustupi Spěwny consorcium seniorow. Wunošk z wječora nałoži so za pomocnu akciju Towarstwa Cyrila a Metoda „Łužica pomha“. K tomu je přinošk na srjedźnej stronje w tutym Katolskim Posole wozjewjeny. Po koncerće su wšitcy na zhromadne spěwanje přeprošeni.

## Pišćelowy koncert z Tomašom Žurom

Na předwječoru druheje adwentneje njedzele sobotu, 5. decembra, w 17 hodž. wuhotuje organist Berlinskeje katedrale swjateje Jadwigi Tomaš Žur pišćelowy koncert w Ralbičanskej cyrkwi. Rodženy Baćonjan zahraje twórby Bruhnsa, Bacha, Dandrieua, Mozarta a Hakima. Wšitcy su wutrobnje přeprošeni.

## Adwentne wiki w klóštrje Marijinej Hwězdze

We wobchodze a bróžni klóštra Marijineje Hwězdy w Pančicach-Kukowje přewjedu so pjatk a sobotu, 4. a 5. decembra, wot 8.00 do 18.00 hodž. adwentne wiki. Sobotu popołdnu w 14 hodž. poswjeća powjetšeny džěl klóšterskeho wobchoda. Džěci móža sobotu w tym času, hdyž so dorosceni rozhladuja, paslić abo na bajku słuhać. Mjez druhim poskića tam wobaj dnjej pječwa z klóšterskeje pjekarnje, dziwinu z klóšterskich lěsow a ryby z klóšterskich hatow.

## Młodostni na adwentničku!

Adwentnička serbskich młodostnych budže njedźelu, 6. decembra, we Wotrowje. Započatk je w 14 hodž. z nyšporom w cyrkwi, kotryž wuhotuje chór 1. serbskeje kulturneje brigady. Hladajo na to, zo chcemy so bórže na swětowe zetkanje młodžiny do Krakowa podać, poskići farar Tomaš Dawidowski dohlad do swojeje domizny. Mamy za was tež hišće překwapjenki spřihotowane. Budžće kusk wćipni!

*Leńka a Lucija, młodžinskej referentce dekanatneho dušepastyrstwa, a dekanatny kružk*

## Wustajeńca žlobikow w Šěrachowje

Wjace hač sto Božich narodkow móža sej zajimcy sobotu a njedźelu, 5. a 6. decembra, wot 9 do 18 hodž. na farskej žurli swjateje Hilžbjety w Šěrachowje wobhladać. Mjez nimi su mnohe rězbowane Bože narodki z Čech. Swójbny ze Šěrachowa a blišeje wokoliny tutu wustajeńcu kóždy dwě lěće natwarja a zjawnosći prezentuja.

## **Adwentny koncert Budyskich gymnaziastow**

Na swój tradicionelny adwentny koncert přeprašuje chór 1. serbskeje kulturneje brigady z.t. sobotu, 12. decembra, w 17 hodź. do Michałskeje cyrkwy w Budyšinje. Nimo znatych serbskich spěwow zaklinča pólske a ruske pěsnje kaž tež instrumentalne twórby. Cyłkowny wumělski nawod změje Friedemann Böhme.

## **Paslenje hodownych darikow**

Dekanatne dušepastyrstwo přeprašuje šulerki a šulerjow 6. do 8. lětnika sobotu, 12. decembra, wot 9.00 do 14.00 hodź. na paslenje hodownych darikow do Don Boskoweho domu we Worklecach. Zajimcy njech so prošu hač do wutory, 8. decembra, pod telefonowym čisłom (03 57 96) 8 87 07 we Worklecach přizjewja. Za wudawki zběra so na wobdźělnika přinošk we wysokosći dźesać eurow.

## **Předstajenje knihi „Hdže statok mój“ w Chróšćicach**

„Hdže statok mój“ je titul knihi Berlinskeho awtora Bena Knebla, kiž je runje w Ludowym nakładnistwje Domowina wušla a kiž wěnuje so burskemu žiwjenju na wsy w 1940tych lětach. Na zakładze nazorneho wopisowanja domjaceho statoka a ródneje wsy Baćonja skići awtor dohlad do dźensa nimale pozabyteho wjesneho burskeho žiwjenja, kajkež wone tehdy we Łužicy běše. Dojimawje wopisuje Beno Knebel mjez druhim napohlad domskeho, dwór ze šćěpowcom a kołcom a pódlanske twarjenje z rězańcu a kólnju. Zeznajemy wochěžu ze swjećatkow swjateho Floriana, dobru stwu, ze zawarjenym sadom a peklowanym mjasom pjelnjeny wjelbik, wuhotowanje najstwy kaž tež dwór wobdawacu zahrodu ze zeleninu, kwětkami a małym hatkom. Knižna premjera budže sobotu, 12. decembra, w 19.45 hodź. w Chróšćanskej putniskej hospodze.

*M. Mětowa*

## **Za Swětowe zetkanje młodžiny so přizjewić**

Serbscy młodostni podadza so klětu zhromadnje na Swětowe zetkanje młodžiny do Krakowa. Tute wotměje so wot 20. do 31. julija. Přizjewić měli so k tomu najpozdžišo hač do 20. januara 2016 z formularom. Tute su w cyrkwjach wupožowane. Samsny formular je pod [www.posol.de](http://www.posol.de) wozjewjeny. Wšitke nadrobne informacije su na tutej flajerach tohorunja podate.